

大毘婆沙論

才一百四十七

三百八十六  
靜七

5-05-79



Handwritten notes or markings along the right edge of the page, including a vertical line and various scribbles.

阿毗達磨大毗婆沙論卷第一百四十七

五百大阿羅漢等造 三藏法師 玄奘奉 詔譯

根蘊第六中有納息第二之一

欲有相續最初得幾業所生根如是等章及  
解章義既領會已當廣分別然有聲目多義  
如前廣說此中說續衆同分有情數五蘊名  
有相續有五亦如前說此中依二相續作論  
謂中有相續生有相續欲有相續最初得幾  
業所生根荅外生胎生濕生得二謂身根命  
根問最初羯邏藍位亦得餘色根不若得者  
如何於少時頃便得尔所根耶又此中何故  
不說毗奈耶說復云何通如說於母腹中二

根初得謂身與命若損害彼乃至廣說若不  
得者何故經說天眼觀知是男是女荅有言  
亦得問如何於少時頃便得尔所根耶荅尔  
時雖無諸色根相而已具得彼根種子如清  
鹽水蘇蜜沙糖酒等和合貯在一器若以草  
端露取一滴於中具有鹽等諸味羯邏藍位  
應知亦尔一切色根種子皆具問若尔何故  
此中不說荅應說而不說者當知此義有餘  
有說此中說皆得者餘得不定是以不說如  
生盲等不得眼等問毗奈耶說復云何通荅  
彼說能持諸餘根者謂身根能持諸餘色根  
命根能持餘非色根是故偏說有說此位不

得餘色根問天眼云何觀知男女荅羯邏藍  
時雖無男女根而有男女相由觀彼相得知  
男女所以者何非彼已有男女二根可說觀  
故有餘師說依經故知經說若胎是男依母  
右脇向背蹲坐若胎是女依母左脇向腹蹲  
坐得天眼者觀此差別依經而記或有說者  
觀中有知謂天眼觀中有後位若是男子入  
於母胎知此羯邏藍是男非女若女入者復  
知此位是女非男如是說者羯邏藍位未得  
餘色根鉢邏奢佉位中方乃得故化生得六  
或七或八無形者六謂眼耳鼻舌身命根一  
形者七謂前六及男女根隨一二形者八謂

前六及男女根問餘無色根今時亦得謂意  
五受信等五根此中何故不說答此中應說  
而不說者當知有餘有說今時一切得者此  
中則說餘無色根雖有得者而非一切是故  
不說謂上地終生下地時雖得彼根若自地  
終還生自地彼皆不得是故不說有說此中  
但問初得業所生者初受生位餘無色根雖  
有得者而非業生故此不說後位所得雖業  
所生而非初得故亦不說色有相續最初得  
幾業所生根答六謂眼耳鼻舌身命根無色  
有相續最初得幾業所生根答一謂命根頗  
思惟欲界繫法徧知欲界耶乃至廣說此中

思惟者是取所緣義徧知者是究竟斷義此文顯示緣彼彼界法離彼彼界染或不能離頗思惟欲界繫法徧知欲界耶荅徧知此通異生及聖者通無間道及解脫道若世俗道離欲染時九無間道緣欲界法離欲界染若無漏道苦集法智離欲染時九無間道九解脫道緣欲界法離欲界染頗思惟欲界繫法徧知色界耶荅不徧知頗思惟欲界繫法徧知無色界耶荅不徧知問何故俱不徧知荅欲界是不定界非修地非離染地色無色界是定界是修地是離染地非緣不定界非修非離染地法能離定界修地離染地染有說

欲界是麤界色無色界是細界非緣麤界法  
能離細界染有說欲界是下界色界是中界  
無色界是妙界非緣下界法能離中妙界染  
有說欲界是劣界色無色界是勝界非緣劣  
界法能離勝界染由此等義故不徧知頗思  
惟色界繫法徧知色界耶荅徧知此通異生  
及聖者通無間道及解脫道若世俗道離色  
染時九無間道緣色界法離色界染若無漏  
道苦集類智離色染時九無間道九解脫道  
緣色界法離色界染頗思惟色界繫法徧知  
欲界耶荅徧知此通異生及聖者惟解脫道  
非無間道謂世俗道離欲染時九解脫道緣



色界法離欲界染

頗思惟色界繫法徧知無色界耶荅不徧知  
問何故不徧知荅色界是麁界無色界是細  
界非緣麁界法能離細界染有說色界是中  
界無色界是妙界非緣中界法能離妙界染  
有說色界是劣界無色界是勝界非緣劣界  
法能離勝界染由此等義故不徧知

頗思惟無色界繫法徧知無色界耶荅徧知  
此惟聖者非異生通無間道及解脫道謂無  
漏道苦集類智離無色染時九無間道九解  
脫道緣無色界法離無色界染

頗思惟無色界繫法徧知欲界耶荅不徧知

問何故不徧知。答以極遠故。非觀極遠界法。能離極遠界染。

頗思惟無色界繫法。徧知色界耶。答徧知此通異生及聖者。惟解脫道非無間道。謂世俗道離色染時。九解脫道緣無色界法。離色界染。幾根徧知欲界。答世俗道七無漏道。八世俗道七者。謂意捨信等五根。無漏道八者。謂前七及已知根。

幾根徧知色界。答世俗道七無漏道。十世俗道七者。謂意捨信等五根。無漏道十者。謂前七及喜樂已知根。

幾根徧知無色界。答十一。謂前十及具知根。

已。知根爲無間道具。知根爲解脫道。當知此  
依最後位說。問離欲界染時。最後解脫道。容  
有根本初靜慮現前。彼以捨根爲無間道。言  
根爲解脫道。何故不依最後位說。世俗道或  
八無漏道。或九耶荅。此文應作是說。世俗道  
七。或八無漏道。八。或九。而不說者。當知有餘  
有說。此中說決定者。謂離非想非非想處。染  
時。定以具知根爲最後解脫道。離欲界染時  
非定。以喜根爲最後解脫道。有於今時。不能  
即入根本地。故然於今時。多依近分。故惟說捨  
徧知欲界時。徧知幾根。荅四。謂女男苦憂根  
雖於今時。徧知十九。而依永斷無餘。無分無

片無影無隨縛斷故作是說或此中說上界  
不行不可得者故惟說四徧知色界時徧知  
幾根荅五謂眼耳鼻舌身根雖於今時徧知  
十三而依永斷無餘無分無片無影無隨縛  
斷故作是說或此中說上界不行不可得者  
故惟說五徧知無色界時徧知幾根荅八謂  
意命捨信等五根由此諸根離非想想  
處染時皆永斷故

幾根得預流果荅九謂意捨信等五未知當  
知已知根未知當知根爲無間道已知根爲  
解脫道幾根得一來果荅若倍離欲染入正  
性離生者九如預流說若從預流果得一來

果者世俗道七無漏道八七者謂意捨信等  
五根八者謂前七及已知根幾根得不還果  
荅若已離欲染入正性離生者九謂意根樂  
喜捨根隨一依地別故信等五未知當知已  
知根未知當知根爲無間道已知根爲解脫  
道若從一來果得不還果者世俗道七無漏  
道八七及八如一來說此依多分若入根本  
或八或九幾根得阿羅漢果荅十一謂意樂  
喜捨信等五已知具知根已知根爲無間道  
具知根爲解脫道問此說十一爲以用故爲  
以有故若以用者無有一時三受並用如何  
說十一若以有者得不還果亦有三受何故

不說答此以用故不以有故問無有一時三  
受並用云何說十一耶答依一相續作用而  
說故無有過謂容有一補特伽羅先以樂根  
得阿羅漢退已用喜復退用捨或初退用捨  
後退用喜如先以樂如是先喜先捨隨應亦  
亦證不還果無如是事若以此根先得彼果  
退已還用此根而得此根者即捨根以喜樂  
得無退義故

得預流果徧知幾根答無尔時未有一根究  
竟斷故得一來果徧知幾根答無尔時亦未  
有根究竟斷故得不還果徧知幾根答若已  
離欲染入正性離生者無義如前說若從一

來果得不還果者四謂女男苦憂根得阿羅漢果徧知幾根荅八謂命意捨信等五根諸根得預流果此根得彼果已當言成就當言不成就荅解脫道攝者當言成就無間道攝者當言不成就道類智俱生品諸根是解脫道攝此當言成就已得故道類智忍具王品諸根是解脫道攝此當言不成就已捨故言根得一來果此根得彼果已當言成就當言不成就荅解脫道攝者當言成就無間道攝者當言不成就道類智或第六解脫道俱生品諸根是解脫道攝此當言成就已得故道類智忍或第六無間道俱生品諸根是無間

道攝此當言不成就已捨故諸根得不還果  
此根得彼果已當言成就當言不成就答解  
脫道攝者當言成就無間道攝者當言不成  
就道類智或第九解脫道俱生品諸根是解  
脫道攝此當言成就已得故道類智忍或第  
九無間道俱生品諸根是無間道攝此當言  
不成就已捨故問以無漏道得一來不還果  
時可言無間道攝者不成就若以世俗道得  
二果時無間道不捨去何言不成就答此二  
果文應作是說解脫道攝者當言成就無間  
道攝者當言成就或不成就而不作是說者  
當知此中惟依不共勝道而說有言此說現



前成就以世俗道得二果已無間道諸根定  
不現前故諸根得阿羅漢果此根得彼果已  
當言成就當言不成就答解脫道攝者當言  
成就無間道攝者當言不成就最初盡智俱  
生品諸根是解脫道攝此當言成就已得故  
金剛喻定俱生品諸根是無間道攝此當言  
不成就已捨故諸根得預流果此根斷何界  
結苔色無色界或無斷色無色界者謂道類  
智忍俱生品諸根或無者謂道類智俱生品  
諸根以解脫道非斷對治故此根何果攝苔  
預流果或無預流果攝者謂道類智俱生品  
諸根或無者謂道類智忍俱生品諸根諸根

得一來果此根斷。何界結。若欲界或色無色界或無斷。欲界或無者。諸從預流果得一來果時第六無間道俱生品。諸根斷。欲界結。第六解脫道俱生品。諸根不斷。結斷。色無色界或無者。謂倍離欲。染入正性離生。得一來果時。道類智忍俱生品。諸根斷。色無色界結。道類智俱生品。諸根不斷。結此根何界攝。若一來果或無一來果攝者。謂第六解脫道及道類智俱生品。諸根或無者。謂第六無間道及道類智忍俱生品。諸根得不還果。此根斷。何界結。若欲界或色無色界或無斷。欲界或無者。謂從一來果得不還果時。第九無間

道俱生品諸根斷欲界結第九解脫道俱生  
品諸根不斷結斷色無色界或無者謂已離  
欲染入正性離生得不還果時道類智忍俱  
生品諸根斷色無色界結道類智俱生品諸  
根不斷結此根何果攝荅不還果或無不還  
果攝者謂第九解脫道及道類智俱生品諸  
根或無者謂第九無間道及道類智忍俱生  
品諸根諸根得阿羅漢果此根斷何界結荅  
無色界或無斷無色界者謂金剛喻定俱生  
品諸根或無者謂初盡智俱生品諸根此根  
何果攝荅阿羅漢果或無阿羅漢果攝者謂  
初盡智俱生品諸根或無者謂金剛喻定俱

生品諸根

得預流果時所捨諸根此根斷何界結荅欲界或色無色界或無得預流果時見道所攝已得諸根名為所捨此根或斷欲界謂四法智忍俱生品諸根或斷色無色界謂四類智忍俱生品諸根或無謂七智俱生品諸根此根何果攝荅無以無預流下果攝此諸根故得一來果時所捨諸根此根斷何界結荅欲界或色無色界或無若倍離欲染入正性離生得一來果時見道所攝已得諸根名為所捨此根或斷欲界謂四法智忍俱生品諸根或斷色無色界謂四類智忍俱生品諸根或

無謂七智俱生品諸根若從預流果得一來  
果時預流果及此勝果道所攝諸根名為所  
捨此根或斷欲界謂六無間道所攝諸根或  
無謂預流果及此勝果道中諸加行道解脫  
道勝進道所攝諸根此根何果攝答預流果  
或無預流果攝者謂道類智俱生品所捨諸  
根或無者謂此勝果道及見道所攝所捨諸  
根得不還果時所捨諸根此根斷何界結答  
欲界或色無色界或無若已離欲染入正性  
離生得不還果時見道所攝已得諸根名為  
所捨此根或斷色無色界謂四類智忍俱生  
品諸根或無謂四法智忍及七智俱生品諸

若若從一來果得不還果時一來果及此勝  
果道所攝諸根名為所捨此根或斷欲界諸  
三無門道所攝諸根或無謂一來果及此勝  
果道中諸加行道解脫道勝進道所攝諸根  
此根何果攝答一來果或無一來果攝者謂  
道類智俱生品及第六解脫道所攝所捨諸  
根或無者謂此勝果道及見道所攝所捨諸  
根得阿羅漢果時所捨諸根此根斷何界經  
答色界或無色界或無得阿羅漢果時不還  
果及此勝果道所攝諸根名為所捨此根或  
斷色界謂離四靜慮染各有九無間道所攝  
諸根或斷無色界謂離四無色染各有九無

問道所攝諸根或無謂不還果及此勝果道  
中諸加行道解脫道勝進道所攝諸根

此根何果攝答不還果或無不還果攝者謂  
道類智俱生品及第九解脫道所攝所捨諸  
根或無者謂此勝果道所攝所捨諸根

得預流果時所得諸根此根斷何界結答無  
謂得預流果時所得諸根皆是解脫道類所  
攝惟無間道攝能斷煩惱故此根何果攝答  
預流果或無預流果攝者謂道類智俱生品  
所得諸根或無者謂今時所得世俗諸根問  
今時所得諸根皆是無漏預流果攝復有何  
世俗根是今所得而言或無答此文但應說

預流果不應言或無而說或無者欲顯今時  
所得命等八根是無始時來所未曾得以是  
初得聖果依故

得一來果時所得諸根此根斷何界結荅無  
義如前說

此根何果攝荅一來果或無一來果攝者謂  
道類智俱生品及第六解脫道所攝所得諸  
根或無者謂今時所得世俗諸根

得不還果時所得諸根此根斷何界結荅無  
義如前說

此根何果攝荅不還果或無不還果攝者謂  
道類智俱生品及第九解脫道所攝所得諸



根或無者謂尔時所得世俗諸根得阿羅漢  
果時所得諸根此根斷何界結荅無義如前  
說此根何果攝荅阿羅漢果或無阿羅漢果  
攝者謂初盡智俱生品所得諸根或無者謂  
尔時所得世俗諸根

諸頤流者所成就根此根斷何界結荅欲界  
或無斷欲界者謂六無間道所攝諸根或無  
者謂預流果及此勝果道中諸加行道解脫  
道勝進道所攝等諸根此根何果攝荅預流  
果或無預流果攝者謂道類智俱生品所成  
就諸根或無者謂預流者所成就勝果道所  
攝諸根及所成就餘善有漏染污無覆無記

諸根

諸一來者所成就根此根斷何界結荅欲界或無斷欲界者謂三無間道所攝諸根或無者謂一來果及此勝果道中諸加行道解脫道勝進道所攝等諸根

此根何果攝荅一來果或無一來果攝者謂道類智俱生品及第六解脫道所攝所成就諸根或無者謂一來者所成就勝果道所攝諸根及所成就餘善有漏染汚無覆無記諸根諸不還者所成就根此根斷何界結荅色界或無色界或無斷色界者謂離四靜慮染各有九無間道所攝諸根斷無色界者謂離

四無色染各有九無間道所攝諸根或無者  
謂不還果及此勝果道中諸加行道解脫道  
勝進道所攝等諸根

此根何果攝答不還果或無不還果攝者謂  
道類智忍俱生品及第九解脫道所攝所成  
就諸根或無者謂不還者所成就勝果道所  
攝諸根及所成就餘善有漏染污無覆無記  
諸根

諸阿羅漢所成就根此根斷何界結答無以  
阿羅漢諸結已盡無可斷故此根何果攝答  
阿羅漢果或無阿羅漢果攝者謂阿羅漢所  
成就無漏諸根或無者謂阿羅漢所成就善

有漏無覆無記諸根

諸預流者斷結諸根此根斷何界結荅欲界  
謂欲界修所斷前六品結此根何果攝荅無  
謂無間道能斷諸結沙門果所攝諸根必是  
解脫道故諸一來者斷結諸根此根斷何界  
結荅欲界謂欲界修所斷後三品結此根何  
果攝荅無所以如前  
諸不還者斷結諸根此根斷何界結荅色界  
或無色界色界者謂四靜慮修所斷各九品  
結無色界者謂四無色修所斷各九品結此  
根何果攝荅無所以如前諸阿羅漢諸結已  
盡無斷結根故不問荅

諸預流果所攝諸根此根斷何界結答無以  
沙門果所攝諸根是解脫道惟無間道能斷  
結故諸一來果不還果阿羅漢果所攝諸根  
此根斷何界結答無所以如前阿羅漢果又  
無結可斷故

諸苦智是於苦無漏智耶乃至廣說問何故  
作此論答欲令疑者得決定故謂苦智集智  
行相無雜所緣有雜滅智道智行相無雜所  
緣無雜或有生疑如苦智行相無雜所緣  
有雜滅道智亦如是耶如滅道智行相無雜  
所緣無雜苦智亦如是耶爲令此疑得決  
定故顯苦智集智所緣有雜滅道智所緣無雜

故作斯論問何故苦智集智行相無雜所緣  
有雜答離苦無集離集無苦故謂一一有漏  
事果義名苦因義名集即於一一有漏事中  
若智作苦等四行相轉名苦智若智作集等  
四行相轉名集智故苦集智行相無雜所緣  
有雜滅智道智行相所緣二俱無雜滅等道  
等行相異故有爲無爲所緣別故  
諸苦智是於苦無漏智耶設於苦無漏智是  
苦智耶答諸苦智是於苦無漏智由無漏智  
於苦事中作非常苦空非我四行相轉名苦  
智故有於苦無漏智非苦智謂於苦智集智  
由無漏智於苦事中作因集生緣四行相轉

名集智故前已說離苦無集故集智所緣亦  
名為苦

諸集智是於集無漏智耶設於集無漏智是  
集智耶答諸集智是於集無漏智由無漏智  
於集事中作因集生緣四行相轉名集智故  
有於集無漏智非集智謂於集智苦智由無  
漏智於集事中作非常苦空非我四行相轉  
名苦智故前已說離集無苦故苦智所緣亦  
名為集

諸滅智是於滅無漏智耶答如是設於滅無  
漏智是滅智耶答如是諸道智是於道無漏  
智耶答如是設於道無漏智是道智耶答如

是由前已說滅智道智行相所緣俱無雜故  
若無漏智緣擇滅作滅靜妙離四行相轉名  
滅智若無漏智緣聖道作道如行出四行相  
轉名道智故

說一切有部發智天毗婆沙論卷第一百四十七

靜



